



## Damonda da baghegiar

Nr. 37/2023

Datum da publicaziun: 17-03-2023

Patrun: Giger Arnold, 7302 Landquart

Representant: Biro d'architectura Carigiet SA, 7130 Ilanz/Glion

Liug e parcella: Rabiun-Via Foppas Laus; 6643

Object: construcziun d'ina terrassa e sanaziun parziala interna

Il profils ein tschentai ed il plans da construcziun ein deponi tier la canzlia communal. L'investa publica cuozza 20 dis dapi il datum da publicaziun.

Eventualas protestas encunter sura damonda da baghegiar ein d'inoltrar alla cumissiun da baghegiar Sumvitg enteifer 20 dis dapi il datum da publicaziun.

Sumvitg 17-03-2023

*Cumissiun da baghegiar*

## Cartas dil di

Las Viasfier federalas svizras vegnan naven dils 01-01-2024 buca a cuntinuar cun la vendita dallas cartas da viagiari dil di per vischnauncas ella fuorma dils davos onns. La fuorma d'ina semeglionta carta ei vegnida presentada l'entschatta fevver 2023 alla publicitad. Davart il niev sistem vegn l'administraziun communal ad informar a dretg temps.

Igl abbonament dalla vischnaunca da Sumvitg per duas cartas da viagiari dil di scada cun la fin da zercladur 2023 ed igl ei buca pusseivel da prolungir igl abbonament sulettamein pils sis meins restonts entochen la fin 2023. Consequentamein vegn la vischnaunca da Sumvitg a vender naven dil fenadur 2023 mo pli ina carta per di. Nus supplichein per enconuschientscha ed engraziein per Vossa capientscha.

Sumvitg, 17-03-2023

*Suprastonza communal Sumvitg*

## Informaziun pertuccont grippa d'utschals

Igl uffeci federal da segirezia alimentara e fatgs veterinars ha decidiu da prolungir per l'entira Svizra in perimeter da controlla entochen **silmeins ils 30 d'avrel 2023**. Per impedir la derasaziun dalla grippa d'utschals eis ei impurtont d'impedir il contact digl gagliuom da casa cun utschals. Possessuras e possessurs da gagliuom ston perquei risguardar il suandont:

- Il plaz da semover ordado per gagliuom da casa ei da restrenscher sin plaz serrai, ni da procurar ch'il plaz da pavlar ordado ei buc accessibels per utschals selvadis.
- Gagliunas ein da tener dapersei dad aucas ed utschals.
- Possessuras e possessurs d'animals che san buca tener en quellas prescripziuns, ston tener il gagliuom en in nuegl serrau.

Ulteriuras informaziuns ein disponiblas sin la pagina d'internet [www.sumvitg.ch](http://www.sumvitg.ch).

Nus supplichein da risguardar quels scamonds ed engraziein per Vies sustegn per dar damogn alla grippa d'utschals.

Sumvitg, 17-03-2023

*Suprastonza communal*

## **Orientaziun pertuccont revisiun dalla planisaziun locala**

Il davos meins ha la suprastanza communal elaborau ina proposta dalla revisiun dalla planisaziun locala per mauns dalla preexamianziun. Questa proposta dalla revisiun dalla planisaziun locala duei vegnir inoltrada el decuors dallas proximas jamnas agl uffeci cantunal responsabel per la preexaminaziun. Avon ch'inoltrar la proposta eis ei impurtont per la suprastanza communal da saver informar las convischinas ed ils covischins sco era possessuras e possessurs da terren davart la proposta che vegn inoltrada per la preexamianziun. A caschun d'ina sera d'orientaziun vul la suprastanza communal presentar questa proposta dalla revisiun dalla planisaziun locala.

**L'orientaziun ha liug gievgia, ils 30 da mars 2023 allas 20.00 uras en sala dalla casa da scola Sumvitg.**

La suprastanza communal envida convischinas, convischins, possessuras e possessurs da terren da baghegiar cordialmein all'orientaziun e selegra sin bunas discussiuns.

Sumvitg, 17-03-2023

*Suprastanza communal*

## **Uras d'avertura deponia da verd igniu e deponia da plastic**

La deponia ei aviarta naven da sonda, ils 25 da mars 2023 sco suonda:

- mardis: 17.00 – 20.00 uras
- gievgia: 17.00 – 20.00 uras
- sonda: 09.00 – 12.00 uras

Il suandont ei lubiu da dismetter:

Deponia da caglias

- caglias e roma cun diameter sur 4 cm
- bests da plontas
- pignola senza material jester

Deponia da verd

- roma, dascha e caglias cun diameter entochen 4 cm
- fluras
- tagl da pastget e prau
- fein e strom
- feglia, zerclem e puma curdada
- fluras da balcun e da ruogs cun tratsch, denton senza ruog
- curdems da preparar fretgs, puma e legums
- cordas e sacs cumpostibels
- scorsa
- resgem e stialas da lenna buca tractada
- crosas d'ovs
- fundagl da caffè e jarvas da te

Ulteriuras informaziuns ein disponibilas sin la pagina d'internet [www.sumvitg.ch](http://www.sumvitg.ch). Nus supplichein per enconuschientscha e capientscha.

Sumvitg, 17-03-2023

*Departament ambient*

## **Serrada via Val Sumvitg**

Ord motivs da segirtad resta la via Val Sumvitg serrada naven d'immediat sil tschancun da Val anen per tut traffic.

Sumvitg, 17-03-2023

*Departament traffic*

### **Structuras agricolas 2023**

L'evaluaziun dallas datas da structuras agricolas succeda annualmein l'entschatta digl onn agl uffeci cantunal d'agricultura sur igl internet. Ils menaschis cun biestga armentiva han giu d'annunziar lur datas la entochen miez fevrer 2023.

La finiastra d'internet per l'annunzia dils menaschis d'apiculturs e dils menaschis pigns (hobi) cun tiers manedels sco gagglinas, andas, aucas, cunegls eav. ei aviarta naven dils 16 entochen ils 31 da mars 2023. Sut il suandont link san ils animals vegnir annunziati: [www.agate.ch](http://www.agate.ch)  
Sche Vus haveis difficultads d'annunziar Voss animals sur igl internet vegn supplicau da contactar il gerau d'agricultura Rest Andriu Bearth (079 796 89 58).

Bien engraziament per Vossa collaboraziun.

Sumvitg, 17-03-2023

*Departament agricultura*

### **Lenna da brisch 2023**

La vischnaunca da Sumvitg offerescha a vischinas e vischins la cumpra da lenna da brisch sco suonda:

#### **Pégn**

Igniu, Siltginas, Clavadi

55.00 frs/m<sup>3</sup>

Auters loghens sin damonda.

Ils prezis secapeschan excl. taglia sin plivaleta. Cundiziuns da pagament ein 30 dis net.

Bugen offerin era lenna resgiada, fendida e transports tochen a casa.

Interessents san annunziar lur empustaziuns a scret agl uffeci forestal Sumvitg, Via Quadras Su 10, 7175 Sumvitg, ni e-mail: [uffeci.forestal@sumvitg.ch](mailto:uffeci.forestal@sumvitg.ch), ni per telefon (081 920 25 06). Las empustaziuns ston succeder entochen sil pli tard venderdis, ils **31 da mars 2023**.

Bien engraziament per Vossa empustaziun.

Sumvitg, mars 2023

*Il selvicultur da revier  
Beat Cadruvi*

### **Cuors fundamental per pescadurs giuvens/entschaviders 2023**

L'Uniun da pescadurs Rein-miez organisescha il cuors obligatoric fundamental per pescadurs novs. Il cuors vegn serraus giu cun gl'attest savida da pescar. Quel lubescha al possessur da'acquistar il patent da pescar el cantun Grischun ed en l'entira Svizra, nua ch'il „SANA“ vegn pretendius. Ils cuosts muntan a fr. 75.-- ed includan il gentar cun bubrondas senza il material da scolaziun. Il cuors ha liug:

#### **Sonda, ils 15 d'avrel 2023 en l'aula dalla scoletta a Curaglia**

L'annunzia saveis Vus far sut l'adressa [www.anglerausbildung.ch](http://www.anglerausbildung.ch) ni directamein tiel president dall'uniun Placi Flepp 079 406 74 16. Il material da studi anfleis Vus sut [www.anglerausbildung.ch](http://www.anglerausbildung.ch). *Uniun da pescadurs Rein-miez*

### **Societad da tir Vial Sumvitg**

Invitaziun alla radunonza generala che ha liug **venderdis, ils 17 da mars** en l'ustria dalla Staziun Sumvitg allas 20.00. Cordialmein envida *la suprastonza e cumissiun da tir Societad da tir Vial Sumvitg*

## **Uniun SumvitgViva**

### **Cuors da tagliar plontas cun SumvitgViva**

**Sonda, gl'1. d'avrel 2023** meina l'uniun SumvitgViva atras in cuors da tagliar plontas. Per commembers e commembras da noss'uniun ei la participaziun gratuita. Per ils ulteriurs interessai cuosta il cuors. Annunzias prendin nus bugen encunter entochen ils 25 da mars 2023 sut [info@sumvitgviva.ch](mailto:info@sumvitgviva.ch). Dapli informaziuns anfleis vus sut nossa pagina [www.sumvitgviva.ch](http://www.sumvitgviva.ch).

**Invitaziun alla 3. Radunonza generala sonda, ils 25 da mars 2023** allas 20.00 ell'aula ella casa da scola Sumvitg. Allas 19.15 sentupein nus sin plaz scola ad in'occurenza preliminar. Ei dat ina pintga sorpresa.

#### **Tractandas:**

1. Avertura e beinvegni
2. Elecziun d'in dumbravuschs
3. Approbaziun dil protocol dalla radunonza generala dils 5-3-2022
4. Rendaquen 2022
5. Rapport dil president
6. Elecziun complementara d'inA commemberRA pil post da revisiun
7. Program da lavur 2023
8. Orientaziuns e varia

Cordialmein envida *la suprastonza*

## **Uniun samaritana Sumvitg-Trun**

### **Cuors d'emprem agid**

L'uniun samaritana Sumvitg-Trun meina atras a Trun **mardis, ils 21 da mars 2023** dallas 18.30–20.30 e sonda, ils 25 da mars 2023 dallas 8.00–12.00 e dallas 13.30–17.30 il cuors d'emprem agid. Annunzias prendin nus bugen encunter sut tel. 079 227 40 37.

## **Casa S. Martin Trun**

La Casa s. Martin a Trun, envida parents ed enconuschents da nossas cussadentas e nos cussadents sco eravischinas e vischins da lunsch e da maneivel all'usitada «stiva da caffè». Mira sut Trun!